


■ OR DA LA VITA DA LUDMILLA CAHENZLI



ILLUSTRATURA YVONNE GIENAL/WWW.YVONNE-GIENAL.CH

Sururas da babs

Da Silvester essan jau e mes um Eugen stads envidads tar amis. Sin visita era anc in auter pèr. En il decurs da la saira han ils umens cumenzà a discurre da sururas.

«Quest onn hai jau fatg tschiente-ventg sururas», di l'emprim.

Sinaquai fa il segund, mes Eugen, cun in sospir profund: «Jau hai era lavurà bler memia bler quest onn. Dasperas vuleva jau retrair in pau da las 200 sururas ch'jau aveva fatg l'onn passà.»

«T'imagina! Jau hai uss en tut 500 sururas. 300 da quellas avev'jau fatg sulettamain l'onn passà», raquinta il terz.

Entant ch'ils trais eroxs sa lamentan mordio, ma dumond jau: Co èsi pussaivel che quests umens vegnan sin tantas sururas? Els èn la finala babs dad uffants da scola. Sa sch'els dorman en biro? U sa sch'els n'èn betg pipa da dumbrar endretg?

Cunzunt tar quel che sa gloriescha cun sias 500 sururas hai jau gronds dubis. El va la damaun adina pli tard a lavurar che mes Eugen. Jau ves el adina, cura ch'jau vom mezza en biro. Ed el turna la saira avant mes Eugen. Jau sai quai, damai ch'el telefonescha savens gia da las tschintg per far giu insatge. E vacanzas fa il mister-500-sururas adina cun ils uffants, pia minimum dudesch emnas l'onn. Ma el pretenda: «Jau lavur savens la notg, cura che naging vesa.» In detg bau da la notg!

Tuttenina ma crodi si che las dunnas na din nagut. Per il solit discurren mias amias uschè bler ch'ils umens na vegnan strusch en cun il pled. Ma tar il tema sur-

uras n'han ellas para da dir nagut. Jau era betg. Anzi, jau hai plitost da zuppentar insatge, pertge ch'jau sun adina en il minus.

Betg da smirvegliar: sche mia figlia pitschna è malsauna, stun jau a chasa. Sche mes figl ha puspè ina giada fatg ina cupitgola ed ha ina rusna en il chau, vom jau cun el tar il medi per laschar cuser. In'emna pli tard vom jau anc ina giada cun el tar il medi per laschar trair ils fils. Sche la figlia gronda fa bunamain en las chautschas pervi dad ir tar il dentist, vom jau halt cun ella, malgrà ch'ella fissa gronda avunda dad ir persula. Visitas da scola na lasch jau mai ora, era sch'ellas crodan sin in di da lavur. Sche la frestgera è vida, bandun jau la saira pli baud mes biro e vom a far cumissiums. Sche mes um sto manar avant ses auto e n'ha betg peda, fatsch jau quai. Sch'el dovra tut surura ina cravatta naira per ir suenter bara, vom jau a cumprar ina, malgrà ch'jau stuess anc lavurar duas uras. Ed uschia en perpeten. En perpeten?

Jau guard sin mias duas amias che han sco jau in job parzial. Probabel sbattan er ellas pli u main cun ils medems problems. Nus essan bain tabalorias, pens jau. Da curre e curre, entant che noss umens sa glorieschan cun tschients sururas.

Ma mo spetga, mes char Eugen. L'onn proxim ta gid jau a bajegiar giu tias sururas. Lura surpiglias ti las visitas da scola, ils discurs cun ils scolasts, las cumissiums en il migros e vas cun la gronda tar il dentist. L'auter onn survegn nossa gronda

numnadamain ina dentera, quai dat ina massa terminis e tias sururas lieuan sco in toc glatsch en l'aua buglienta. E forsà mainas ti schizunt avant mes auto, perquai ch'jau n'hai betg gist peda quel di ch'i fiss dad ir.

Memia severa na less jau dentant betg esser. Da laschar cuser las rusnas en il chau da noss figl surpigl jau vinavant. Talas rusnas chaschunan sanganadas ed Eugen dat vi da mauls, sch'el vesa sang. E sche Eugen dess vi da mauls e survegniss forsà er ina rusna en il chau, stuess jau la finala tuttina bandunar mes biro ed ir a chasa a tgirar umens cun rusnas en il chau.

So, quai fiss pia mes propiest per l'onn vegnint. Bajegiar giu las sururas da mes Eugen.

Era mias amias vegn jau ad orientar. Ellas suondan lura segir mes exempel e gidan lur umens cun las sururas. Jau sun bunamain in zic schigliusa sin l'amia cun il mister-500-sururas. Sch'ins patratga! 500 sururas èn gea pli che 10 emnas da lavur. Entaifer quel temp pon ins accompagnar uffants d'ina entira citad tar il dentist. E las mammas da quests uffants en questa citad pon far sururas en tutta cumadaivladad.

Jau giavisch in bun onn nov! Cun paucas sururas per ils umens e paucas minus-uras per las mammas!

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria